

Euskaraz badugu zer irakurria

Urtarrialaren 15ean EUSKARAZ BADUGU ZER IRAKURRIA izeneko kanpaina aurkeztu zen Gipuzkoako Foru Diputazioan. Oso helburu zehatza du kanpainak: gazteak euskarazko liburuetara erakarzea, euskal literatura gertu ikus eta irakur dezaten bultzatzea.

Aldi berean, ikastetxeei lagundu egin nahi zaie literatur bildumak hobetu eta zabal ditzaten, bertako ikasleek nahiz irakasleek irakurgaiak eskura izatea baita gure literatura irakurri, ezagutu eta, hartara, maitatu dezaten modurik onena.

Liburuak ez ezik idazleen mundua bera era hurbilerazi nahi da eskoletara. Horregatik, liburugileak berak ikastetxean bertan izateko aukera eskainiko da kanpainaren bitartez. Ikasleei zuzendutako hitzaldietan, arte idatziaren baloreak, arte adierazpideen arteko harremanak, literatur pentsaerak, mugimenduak eta estiloak aztertuko dira. Zalantzarik gabe, idazlea eta irakurlea, mezu emailea eta hartzailea aurrez-aurre egoteak arrunt lagundu dezake euskarazko literaturgintza ulertzea eta estimatzen ikastea.

Asmo honi guztiari indarra ematearren publizitate kanpaina bat egingo da kartel eta pegatinen bitartez. Eta galde-sorta batzuk ere prestatu dira, idazleen beraien aholkuezt, ikasleen artean banatu eta zer irakurgai gustatu zaizkien eta kainpainaz zer derizkioten jakiteko. Datu horiek jasotzean programak zertarainoko eragina izan duen ikusteko aztertuko ditugu, eta ikasleek gustoko zer duten jakiteko ere balio izango digute. Horrela, aurrerantzean irakurtzaletasuna haunditzeko kanpainak emankorrago bihurtzea errazagoa izango zaigu.

OHOKo ikasleentzako liburu eskaintzarako 125 titulu hautatu dira. Batzuk jatorriz euskaraz idatziak dira, beste batzuk euskarara itzuliak. BBB, UBI eta LHRako, berriz, ia 120 obra aukeratu ditugu. Gipuzkoan ia 400 ikastetxe daudenez eta denei bidali zaizkienez, 52.000 liburutik gora banatu ditugu denetara. Banaketa, ordea, ez da horretara mugatu nahi, euskarazko irakurle izan daitekeen ororengana iritsi nahi baitugu.

Azkenik, gure hizkuntzan liburuak argitaratzeko garaian —ale kopuruetan etab.— izaten diren mugak kontuan hartuta euskarazko argitaletxeei laguntza ekonomiko bat eskaintzea, alegia, horiei laguntzeak, azken batean, gerora euskarazko liburugintza hobetzea eta zabaltzea ekarriko duelakoan. Gipuzkoako Foru Aldundiaren kanpaina honen kostua 40 milioi pezetakoa da. Euskarazko irakurleen kopurua haunditzeko balio izatea espero dugu, izan ere “euskaraz badugu zer irakurria”.

Maria Jesus Aranburu Orbeagozo